

Kuasa moral dan wibawa bagi tangani isu agama

Ciri-ciri yang bolehkan rakyat yakin pemerintah tidak berat sebelah dan bersikap adil kepada semua

PEMERINTAH harus mempunyai kuasa moral dan kewibawaan dalam menangani isu-isu keagamaan supaya rakyat berasa yakin bahawa ia tidak berat sebelah dan bersikap adil kepada semua.

Namun, sedang pemerintah berusaha gigih menggalak keharmonian kaum dan agama, rakyat juga perlu memainkan peranan penting bagi objektif tersebut.

Dalam hal ini, struktur masyarakat yang dibina harus menerapkan sikap saling mempercayai dan dapat memberikan respons dengan cepat sewaktu krisis.

Demikian antara pesanan Menteri Undang-Undang merangkap Menteri Kedua Ehwat Dalam Negeri, Encik K. Shanmugam, semasa bercakap dalam dialog Program Mendekati Masyarakat (CEP) di Orchid Country Club, Sabtu lalu.

Beliau menekankan peri pentingnya usaha menyemai dalam diri golongan muda dan warga baru mengenai keharmonian kaum dan agama.

Menurutnya, keharmonian tersebut adalah satu ciri asas penakatan Singapura.

“Pemerintah dan rakyat adalah rakan kongsi utama dalam membina keharmonian kaum dan agama. Pemerintah Singapura secara aktif menggalak keharmonian dan mewujudkan suasana saling mempercayai dalam masyarakat.

“Pada masa yang sama, rakyat juga memainkan peranan penting,” kata beliau.

Pada pelbagai peringkat, usaha harus diteruskan untuk membina kesediaan operasi, kata beliau sambil menambah bahawa CEP adalah satu usaha yang berterusan.

CEP, yang dilancar dalam 2006, adalah satu usaha jangka panjang untuk melengkapkan Singapura dalam memelihara kesepaduan sosial dan keharmonian kaum sekiranya berlaku krisis di Singapura.

Di bawah CEP, anggota daripada pelbagai masyarakat bersatu dan mengeratkan persefahaman.

CEP juga membina rangkaian yang memupuk sikap saling mempercayai yang dapat bertahan dan membantu Singapura kekal bersatu sewaktu krisis.

Para pemimpin masyarakat di bawah CEP telah dilatih untuk bersedia sewaktu kecemasan dan kesediaan mengenai usaha menangani keganasan, di samping memahami akan keharmonian kaum dan agama.

CEP juga aktif mendekati golongan belia.



KONGSI PANDANGAN: Timbalan Perdana Menteri, Encik Wong Kan Seng (*tengah*), mendengar pandangan dan keprihatinan para pemimpin masyarakat yang hadir dalam majlis dialog Program Mendekati Masyarakat.